修訂日期: 2004/11/14 發行日期: 2006/2/1

發行單位: 中華電子佛典協會 (CBETA) http://www.cbeta.org

資料底本: 大正新脩大正藏經 Vol. 12. No. 337

原始資料: 蕭鎮國大德提供,維習安大德提供之高麗藏 CD 經文, 北美某大德提

供

## No. 337 [No. 310(32)]

## 佛說阿闍貰王女阿術達菩薩經

## 西晉月氏國三藏竺法護譯

聞如是。一時佛在羅閱祇耆闍崛山中。與摩訶比丘僧五百人。菩薩八千。一一尊 復尊。悉得陀憐尼法。在所聞知。如大海無所罣礙。悉得五旬深入微妙漚和拘舍羅。 總持空法藏門。不捨志意行無色想。從法行無所歸依。亦不造行。說經法無所著。為 一切故自觀本法。以得忍凡行十事。

是時有菩薩名須彌山。復有菩薩名大須彌山。復有菩薩名須彌山頂。復有菩薩名師子。復有菩薩名和呵未。復有菩薩名常舉手。復有菩薩名常下手。復有菩薩名常精進行。復有菩薩名常歡喜。復有菩薩名常憂念一切人。復有菩薩名珍寶念。復有菩薩名常寶手。復有菩薩名寶印手。復有菩薩名執御。復有菩薩名大御。復有菩薩名常持至誠。復有菩薩名彌勒。如是等十七人。颰陀和等八人。皆如颰陀和類。

颰陀和菩薩。寶滿菩薩。福日兜菩薩。因提達菩薩。和倫調菩薩。常念菩薩。念 益於世間菩薩。增益世間功德菩薩。如是等八人。

爾時佛與八千菩薩俱。在羅閱祇去城不遠。為國王大臣。所敬偶所遵奉所稱譽。 視若如父婆羅門迦羅越所尊重。爾時佛於無央數大眾中說經法。所說上語亦善。中語亦善。下語亦善。所說莫不開發。上中下皆曉了。悉具足無沾污。精進無量於時舍利弗摩訶目揵連。摩訶迦葉。須菩提。邠耨。羅云。蠡越。安波臾。憂波離。阿難。如是復異方不可計是輩。大比丘僧不可計。平旦正衣服持鉢。入羅閱大城分衛。是尊比丘詣城中順街里行分衛。次至王阿闍貰宮。宮人官屬俱一處默然從乞匃。是時王阿闍貰有女。名阿術達(漢言無愁憂)

。年十二端正好潔。光色第一於前世。佛所作功德有神猛之行。供養無央數佛。於阿耨多羅三耶三菩心。不轉於父王正殿金床上坐。安無愁憂見此尊比丘。不轉於父王正殿。今來於坐不起不迎不為作禮。亦不請令坐。亦不與分衛具。諸尊比丘。亦默然觀此女。是王阿闍貰見女無愁憂。不恭敬禮是尊比丘。王顧謂女。汝不知耶。是怛薩阿竭阿羅呵三耶三佛尊比丘。以得阿羅漢無所復畏。所作事勝。以棄重擔。生死以斷深入微妙。其供養是者福不可量。為師為父慈念興福施於一切。汝見何故。於坐不起默而視之。汝有何異利不禮此上尊女無愁憂白言。王曾見師子。當為小小禽獸作禮迎逆坐不。王答女言。不見。女復白。王曾聞遮迦越王當為小國王。起迎逆作禮共坐不。

釋提桓因寧為諸天。起迎逆作禮不。梵三鉢寧禮諸梵不。答言不見。女復白。王曾見 大海神為小小陂池溝渠泉流作禮不。須彌山寧為眾小山作禮不。日月之光明與螢火之 明等不。女復言。如是大王發意。求阿耨多羅三耶三菩心。欲度一切。被僧那僧涅之 大鎧。持大悲大哀。如師子吼。云何當為恐畏。比丘而無大悲大慈大哀。離師子吼中 。云何當禮信歡喜。王曾見大法王轉經論教一切。令發阿耨多羅三耶三菩心。當為是 比丘少智者恭敬作禮不。女白王。如大海水不可量不可度不可見邊際。大智若此。猶 復受泉流如牛跡中水。自謂以滿足。寧可方之於大海。是畏生死比丘。志在滅度。發 阿耨多羅三藐三菩心。寧當迎逆作禮不。王曾見大智。如須彌山最尊高。怛薩阿竭法 為尊雄。豈況智如芥子比丘迎逆作禮不。王寧見日月光。其明所照不可計量。怛薩阿 竭法光明智慧功德名聞。過是千億萬倍。寧比螢火之明自照其身。不及一切人。志小 比丘自度其身。大智之法明於三界。寧迎逆作禮。女白王。佛般泥洹後。尚不為是輩 比丘作禮。何況佛今現在而為法則。所以者何。禮彼比丘為習此法。其親近三耶三佛 法。得三耶三菩行。王告女無愁憂。汝有觝突之心。見是大比丘。不恭敬迎逆以坐席 為賓主。而廣引眾喻不念設飯食。汝何志求。女白王。大王寧有觝突之心耶。女謂王 言。王何故見國中羸劣下賤乞匃者不為作禮。王答女言不。爾此非吾類。女答王亦如 是。王發意菩薩聲聞辟支佛非其類。王告女。吾聞行菩薩法。悉棄強梁瞋恚之心。以 調順軟弱為一切人下屈。汝豈無軟弱之心。女白王言。世間人愚癡。常懷毒惡之心故 。菩薩摩訶薩以慈悲。護彼人欲除眾毒故。此大比丘諸垢以除。是輩比丘。見善無所 增。見惡亦不減。女白王。當來十方佛。設為是比丘等。說深妙之法。不能復增精進 。所以者何。用閉塞生死道故。譬以瓶盛滿水置露地。天雨瓶中一渧不受。渧亦不得 入。所以者何。其瓶以滿故。女白王。是比丘等如是。若十方佛為現神足。變化說經 法。不能逮及如來三昧。於功德無所增益。女白王。譬如大海萬水四流皆歸于海。所 以者何。其海廣長所受不可計量。如是大王。菩薩摩訶薩說經法。當作是見多所饒益 。發摩訶衍心。多所容受。所以者何。菩薩摩訶薩器所受。不可計不可數不可量。是 時女無愁憂。為王阿闍貰說偈言。

為王阿闍貰女 無愁憂以名得 有五百比丘來 我不為起作禮 應時為王所呵 不恭敬比丘僧 我不知是福地 佛子離彼中迹 無憂愁誦偈言 聽我說至誠言 見比丘不為起 意不生欲作禮 人欲乘船入海 取一錢破百分 入法海還為取 百分中取一分 若有人從王乞 若飛行遮迦越

乞匃者求一錢 智慧者令王喜 願施貧使安隱 譬如人求賤寶 聲聞法亦如是 譬如人財為富 願供養於法王 譬如醫自治身 若有醫多治人 發意者智慧師 為黠人所不敬 若黠師知藥名 為天下人所敬 譬如樹無葉果 阿羅漢如是樹 譬如樹栴檀香 菩薩法亦如是 不可以牛迹水 恒水淨無數人 聲聞法牛迹水 菩薩法如恒水 譬如時雨珍寶 若有黠益取多 佛者譬雨珍寶 菩薩採飽滿人 如有人近須彌 若其餘土石山 菩薩法須彌山 得離生死苦惱 暴露在草不多 大雨水潤澤多 聲聞法暴露草 大千中諸來者 迦隨華無有香

為不足從王乞 從王乞千億寶 如是人為曉了 如是人為不黠 入海寶自取少 菩薩黠為珍寶 自致佛度人民 不能愈一切人 是乃為名醫師 自脫身棄餘人 譬醫能自治身 便能治巨億人 發意菩薩如是 無益於世間人 為無益於世間 有益於一切人 以經法開甘露 澡洗人除垢熱 恒水流滿大海 不能除世間熱 能飽滿大千剎 愚於寶取一錢 能使貧至大富 聲聞法取一錢 菩薩施廣如此 皆隨山作金色 不能以色變形 菩薩恩生天上 聲聞不能度人 露不能熟五穀 從潤澤得豐熟 菩薩法如大雨 法所雨潤一切

為世人所不取

私夷華人樂取 優曇鉢及蓮華 聲聞法泇隨華 整聞香聞不遠 菩薩法私夷華 度一切至泥洹 如怯人行空澤 不足以為大難 人中道為大難 將一切度生死 菩薩法人道中 聲聞法行空澤 度生死迷亂者 導一切恐畏人 縛筏浮度不多 筏不能度往還 譬如人造大船 度無數得往還 聲聞法如縛筏 菩薩法如大船 持七覺度一切 脫愛欲過大海 若如被鎧乘驢 不可入大眾中 被鎧人乘馬象 行鬪戰得勝怨 聲聞法如乘驢 菩薩法乘馬象 **华樹下降魔官** 救天上世間人 虚空中滿星宿 星宿眾夜不明 月獨出為大明 男女見大歡喜 菩薩法月獨明 聲聞法如星宿 菩薩恩致安隱 皆令發薩云若 夜之冥螢火明 人不以是為明 日出光為大明 有益於閻浮地 聲聞法如螢火 菩薩慧如日月 悉現明一切人 生死海行度人

爾時王阿闍貰聞女無愁憂說是偈默然。不識是何言。舍利弗心念。是語甚可怪。所說無罣礙點慧乃爾。我欲試之知能歡喜而忍不。舍利弗謂女無愁憂。卿於三乘志欲何求。女報言。乘大悲大慈於所求。舍利弗報言。欲求摩訶衍三跋致耶。女答言不。舍利弗復問。女行欲何求乃作師子吼。女答舍利弗。於所求無所求。有所求則不為師子吼。無所住止能作師子吼。卿舍利弗以法取證寧有聲聞辟支佛法摩訶衍法不。舍利弗答言。無諸法相一耳。空無所有。女問舍利弗。諸法空作何行法而設三乘。舍利弗答方。無所行。舍利弗復問女。有佛法無有佛法。有異無。女答尊者舍利弗。近空及遠空有異無。舍利弗答言。無異。女問舍利弗。譬內空外空有異無。答言無異。如是舍利弗得佛法未得道法。適等無異。女為舍利弗種種說空空法。舍利弗默然。無異辯才折答此言。

女報尊者目揵連。能知三千大千世界星宿數不。目揵連報女言。我當禪定三昧觀本際 。女謂目揵連。怛薩阿竭一一持三昧。視見恒沙中數人民意念所趣向。何況是星宿。 以是故知怛薩阿竭於諸法而有持。是故聲聞辟支佛所不及知。尊者目揵連。寧知十方 佛剎中幾何天地當敗壞。幾何天地當合成。答女言。不知。女復問目揵連。寧知幾佛 以過去。幾佛甫當來。幾佛今見在。答女言。不知。女復問目揵連。世間貪婬有幾人 。喜瞋恚有幾人。愚癡者有幾人。盡行三事有幾人。不行三事有幾人。答言。不知。 女復問尊者摩訶目揵連。世間有幾人求聲聞道。幾人求辟支佛道。幾人求摩訶衍。答 女言。不知。女復問目揵連。世間有幾人求佛道。幾人不信佛道。幾人信九十六種道 。幾人不信九十六種道。適無所信為有幾人。答言。不知。女報目揵連。怛薩阿竭悉 知是事。復過於此不可計無有限。聲聞辟支佛所不能及知。是故怛薩阿竭於諸法而有 持。尊者目揵連。為怛薩阿竭所稱譽神足第一。寧曾至揵陀呵剎土(漢言香潔國) 。是剎中有樹以七寶而挍飾。以眾寶為樹栴檀為華香。摩訶目揵連報女言。本所不聞 本所不見今乃聞。是剎土名字未曾所見聞願聞是剎中怛薩阿竭阿羅訶三耶三佛名字。 今現在說經法不。女報言。彼剎佛名香潔放光明怛薩阿竭阿羅呵三耶三佛。在彼剎說 經法。女無愁憂於坐不起作瑞應三昧。念菩薩初發意。求阿耨多羅三耶三佛。過聲聞 辟支佛上如我。至心願我香潔放光明怛薩阿竭阿羅呵三耶三佛。現光明使諸聲聞見其 剎土。使國中栴檀香香聞是間剎土。女無愁憂立是願。於是香潔放光明怛薩阿竭阿羅 呵三耶三佛。尋時放身相光明。是剎諸聲聞。皆見彼剎土香潔放光明怛薩阿竭阿羅呵 三耶三佛。於大眾中菩薩說經法。諸聲聞自於其處所。聞彼佛所說法皆佛威神之恩。 彼香潔怛薩阿竭阿羅呵三耶三佛持六十種音說。如女無愁憂所說無異。初發意求阿耨 多羅三耶三菩。是輩之人。過聲聞辟支佛上。說是時。彌勒菩薩。白佛言。是栴檀香 從何剎土來。至是間香乃如是。佛語彌勒菩薩。女無愁憂與諸大聲聞。共師子吼有此 善瑞故。現彼香潔放光明佛剎剎中栴檀香滿沙呵剎中。無愁憂女。語尊者目揵連。菩 薩現功德變化。如是者。有何當志於小道。女復問目揵連。寧知揵陀剎去是遠近不。 目揵連答曰。不知。女謂目揵連。如目連等滿是三千大千剎中。譬如蘆葦干柘竹稻草 木。令目連其數如此。時過一劫計彼佛剎無能計知其處。乃過爾所佛剎。乃可得香潔 放光明佛所治。爾時香潔放光明佛。即迴光還歸本土。於是佛剎不復現。目揵連見此 變異。默然無所言趣。尊者摩訶迦葉。謂女無愁憂。寧見前釋迦文怛薩阿竭阿羅呵三 耶三菩不耶。可得見佛色身使佛有所說。云何。

爾時尊者摩訶目揵連。謂女無愁憂。見如來何異。要言聲聞辟支佛所不能及知。

見我色者 聞我聲者 愚癡不信 是人不見 以法見佛 佛者法身

法者難曉 以是叵見

爾時尊者摩訶迦葉作是念。女曾見釋迦文怛薩阿竭阿羅呵三耶三佛不。女答迦葉 言然。我見怛薩阿竭阿羅呵三耶三佛。不持肉眼見不色見。不無色見。亦不持天眼見 。亦不持痛痛思想生死識眼見。亦不智慧眼見。亦不想識見。亦不法眼見。亦不身見 。亦不佛眼見。亦不命見。摩訶迦葉。我見怛薩阿竭。如尊者摩訶迦葉者。為無大明 樂世間生。自謂有身。緣一覺行。念欲見道。摩訶迦葉謂女。設是法無有主。愚癡者 乃樂生。自謂是我身。一切萬物是我所有法想。不於中邊得見。從何而化生。女謂摩 訶迦葉。諸法不可得見。是故法無形。如是不可得見。如何生。摩訶迦葉謂女。佛法 亦空無所有。女復謂摩訶迦葉。欲得見無上正真法者當如法。摩訶迦葉報女。白衣法 我欲聞。況佛道不欲聞。女謂摩訶迦葉。法不見有亦不見無。摩訶迦葉謂女。是法無 。女復謂摩訶迦葉。諸法皆空無有形。不可從諦得見。若善男子善女人。欲見佛身相 。自淨其行於行清淨。得見諸淨是則純熟。摩訶迦葉謂女。云何自淨其行純熟者。女 謂摩訶迦葉。能自觀身空者悉入諸法空。諸法亦不減亦不增。是為自見諸淨。摩訶迦 葉謂女。何等謂身空。女報。空盡空是。是身為空。諸法空亦如是。摩訶迦葉。復問 女無愁憂。從何聞是法乃能信諦。佛有二事因緣得信。聞他人善自念其行。女報迦葉 。他人智說可聞。爾乃自觀身造行。女報摩訶迦葉。若自智慧。復觀一切智。以明為 師。摩訶迦葉報女。云何自知身行善。女答言。聞法觀善。身行善則見善造行。摩訶 迦葉報女。云何菩薩自觀身行善。女答摩訶迦葉。菩薩法與一切天下人共合適不疏遠 。是則菩薩身行善。女復報摩訶迦葉。當來法過去法今現在法。意無增減是為行菩薩 法。摩訶迦葉問女。云何見法無所增無所減。女報摩訶迦葉。有二事。有法無法。不 增不減。作是念。是為自見身意行。見身意行則為無所見知。摩訶迦葉。自見其身。 迦葉謂女。云何自見其身。女報言。如摩訶迦葉。自度身不見一切人。摩訶迦葉答言 。我無所見。女報摩訶迦葉。諸法適無所捨亦無所著。摩訶迦葉默然。無以加報。爾 時尊者須菩提。聞是語。為甚難甚難大歡喜。問女無愁憂。從何得大利乃有此辯。女 報須菩提。亦無得利亦無不得利。慧亦不見法法亦不見慧。亦不內觀亦不外觀。是則 慧。所以者何。須菩提言有法者則非法。如尊者須菩提。第一樂空閑處。法為有處有 說。為有慧無有慧慧無所說。須菩提報女言。不持空閑處。有法處得慧。是法見不是 可說不可出。女報須菩提。一切法悉如是。無從見無從取。云何得大利而有慧。須菩 提報女言。設空無有慧。何從有是語。女問須菩提。寧聞山中大呼有響聲來應不。一 切法悉如是。信不言信是響。有慧無慧本無慧。是響因聲而合成。女問須菩提。是響 出為有響像無。報女言。響無形像響因空而有名。一切法如響因空而出生。女報須菩 提。一切法法所說從空生。須菩提問女言。若一切法從空生。何以故。佛說世間當來 佛如恒沙數。女報須菩提。欲得知法所生處耶。答言欲知。所生處無所生。無所生是 生處。須菩提。恒沙等。不見從如來去。亦無所至。所以作佛者。何法不從。發意亦 不止意。須菩提報女言。是說為第一未生未起。女報須菩提。所說皆第一。若說若不

說亦第一。一切無所生不可說。不可說不離佛法。須菩提報女言。甚難居家為道。乃 有此辯。博覽眾要深入微妙。女報須菩提。菩薩亦無居家。亦無出家。亦無沙門。亦 無不沙門。所以者何。以心意為行。行者以智為上。以黠為善。須菩提問。菩薩有幾 處止。願聞其說。女報須菩提。菩薩持八法住。是故止處在所止。無所不止。聲聞中 第一。何等為八法。往菩薩常行善意。至心求佛無轉誨。一以大慈救護天上天下人。 二不捨大哀離世間法於身命無所著。三行漚和拘舍羅不可計智皆發意求佛。四常行勇 猛不厭見聞求諸法五悉知菩薩行處。六悉救一切人意。七其智不從他人受一切法自證 得忍。八如是。須菩提。持是八法行在所止處。過諸羅漢辟支佛上。於是須菩提默然 。爾時尊者羅云問無愁憂女。乃作是解。曉了眾要總持智慧。何故。自坐金床穢濁。 無謙卑恭敬之心。自處高床。與大比丘難說經法。吾曾聞佛說。人無疾病不得處高床 及臥聽而說經法。女報尊者羅云。寧知世間以何為淨何等不淨。羅云報女言。世間有 持戒信受不犯者是則為淨。若有犯者則為不淨。女報羅云。且止未曉未了所以者何。 羅云。持戒信受不犯者是則不淨。其犯戒者是為淨。所以者何。不倚淨慧則有淨不淨 。本無無淨不淨。諸阿羅漢所見如是。其犯戒者為淨。所以者何。羅云。以離於戒不 復學可至無極慧。遠離惡道過於世間。是故謂為離戒。羅云報女。其人立願不立願有 異無。女報言。尊者羅云。譬如紫磨黃金。持作眾物。珠環瓔鎖。已作未作。前色後 色有異無。報言無異。如是羅云。何故嫌處高床不恭敬謙。苦者意行是本。羅云。昔 菩薩以草蓐於地為坐。過於聲聞坐梵天坐。羅云復問。云何坐得過聲聞坐於梵天。仁 者羅云。菩薩於樹下以草為坐。三千世界剎土釋梵四天王及世間。上至三十三天。其 中人民大鬼神皆來問訊。菩薩中有頭面禮菩薩足者。有跪拜者。有揖讓者。中有叉手 者。為爾不羅云。羅云答言。有是有是。羅云當知菩薩處意高下非謂床坐。是故過聲 聞坐梵天。當作是知。爾時王阿闍貰。告女無愁憂。汝不知耶。尊者羅云。是遮迦越 王種尊第一。信用道德故少小棄家行作沙門。棄遮迦越國。是佛釋迦文子。持戒第一 。汝云何反輕戲不以禮敬。女白王。止莫說是語。寧可以神丹之珠比之於水精。王曾 見師子當生蟲狐。遮迦王子豈當為小國王。王言不爾。女復白王當知是因緣。彼羅云 不從怛薩阿竭。為父母胞胎生。怛薩阿竭師子行。皆降伏九十六種道。神通之智。悉 具足為大聖猛。一切諸法悉了知。無所罣礙。等知一切人心所念。知當來過去今在悉 曉知。為大醫王療人苦痛。常勸助一切轉法輪。舍利弗摩訶目揵連。摩訶迦葉。須菩 提。蠡越。羅云。阿難。如是輩聞法皆奉行。猶非是佛之子。爾時諸尊聲聞在大眾中 。女為說經法。女白王。過去阿僧祇劫有佛名提和竭羅。時婆羅門女。字須羅陀(漢言 鮮潔辯)

。復有婆羅門子。字鞞多衛提和竭羅怛薩阿竭。時持華五莖散佛上。時賣華女發心願 。欲世世為夫婦。乃至于得佛。復發心求摩訶衍。乃爾時過去阿僧祇劫作功德。發願 世世相隨。欲救諸下劣。是故從佛求願。從佛求願終無有空。俱夷者釋種女。大樂發

阿耨多羅三藐三菩心。漚和拘舍羅行勸一切菩薩。示現有妻子男女奴婢象馬金銀珍寶 摩尼珠。所以者何。護九十六種道。不欲使誹謗菩薩。非男子王為生黃門。世有何特 而言忍勤苦。設作是念當墮泥犁中。晝夜苦痛不可言。菩薩乃從提和竭羅怛薩阿竭阿 羅呵三藐三佛以來。菩薩受別無有色思想。女白王。爾時婆羅門子鞞多衛。從提和竭 羅怛薩阿竭阿羅訶三耶三佛。得慧明六萬三昧門逮得無盡明恒沙數陀憐尼法。受是別 時。前所願所為盡悉棄除。從得忍有言。羅云是佛之子。從父母胞胎中生者。是為謗 如來菩薩。於妻子國城不以樂色故。菩薩離愛欲。於世間法無所沾污。女白王。大海 中求火尚可得。菩薩貪婬瞋恚不可得。王當知是法。尊者羅云為化生。不從父母胞胎 生。所化現皆佛威神。菩薩隨習俗而教化。護一切癡意。如幻現形。一切所作常不離 三昧。自現在小兒中。現白衣居士中。現菩薩聲聞中天上人中人非人等尊劣長幼下賤 伎樂宮女。酒食隨所欲度而往生。如是所示現處不可計不可數。眾會中有發心念。誰 為適是怛薩阿竭種姓真子者。等知正見不斷三寶。護七覺意隨所樂而化。是曹之人真 佛之子。若善男子善女人。欲為佛作真子。當發阿耨多羅三耶三菩心。說是語時。王 後宮列女二十五人。皆發阿耨多羅三耶三菩心。時千天子。聞女無愁憂師子吼。皆發 阿耨多羅三耶三菩心。同時發聲言。我是當來佛過去佛之上子。發心已雨於天華。遍 覆羅閱祗大城中。以供養女無愁憂。時無愁憂於金床下。前趣諸尊聲聞。無愁憂女問 諸尊聲聞。為曉分衛法不。諸尊聲聞。答女言。以曉云何曉。答曰身有四神從因緣生 。常覆蓋順化懼有壞敗。以故當飯食之。是身以飯食得立。無飯食則不得安隱。是身 譬如弊壞之車。須脂膏而得所安。所以時食欲護身故。不自貢高行乞。不以為色相。 不以為貪。亦以欲破貪故。女無愁憂。聞諸尊聲聞各各說是事。聞所說亦不喜亦不憂 。如是身為災患勤苦若此。即以時請諸聲聞。供養以百味飯。具飯食訖。竟皆揖讓。 便還耆闍崛山中。聽怛薩阿竭說法。我曹亦俱當往無愁憂女。食後與父母兄弟宗親後 宮列女群臣人民俱。出城到耆闍崛山中。前以頭面著地為佛作禮。遶佛三匝却坐一面 。諸尊聲聞從禪覺亦皆悉來。為佛作禮坐一面。舍利弗從坐起。正衣服下右膝叉手白 佛言。是女無愁憂。所說甚難入深法要。以權行立人不可勝數。所問種種悉能報答。 佛告舍利弗是女無愁憂。以供養九十二億佛。作功德常不離漚惒拘舍羅。舍利弗白佛 。是女何故不棄女人。佛告舍利弗。若諸聲聞謂此無愁憂是女人耶。若等不深入般若 波羅蜜不見人根觀本迹。然便等視於所行。菩薩諮所樂喜以權道示現。有男女其限無 所罣礙。欲度男女故。無愁憂女欲決舍利弗之狐疑。現身立願。使大眾中悉見我是男 子。作是念已。即諸大眾見無愁憂身為男子不復見女人像。無愁憂於時踊在虛空中。 去地七十丈住止空中。佛告舍利弗。見是無愁憂為男子踊在虛空中去地七十丈。若見 不。舍利弗白佛。唯然已見。佛告舍利弗。是無愁憂。却後七百阿僧祇劫當作佛。佛 名鞞竭俞(漢言離愁)

怛薩阿竭阿羅訶三耶三佛。剎名鞞末拘遼害(漢言無垢濁光炎)

- 。其壽十萬劫。佛般泥洹後。經法留止十劫不斷絕。是剎中地皆如細瑠璃。其剎土八方方有一道。是佛所遊行處。以七寶為樹。以眾寶為欄楯。以天繒為華蓋。以名香而香之。無穢惡石沙瓦礫。純以珠寶為萬物。剎中無有泥犁禽獸薜荔。但有菩薩及天與人。譬如忉利天王所居宮。爾時大眾及王阿闍貰歡喜踊躍皆言善哉善哉。王阿闍貰正殿夫人。字旃羅廅(漢言月明照)
- 。於坐起叉手自嗟歎心。白佛言。既得為人難我復懷養。是菩薩益倍踊躍。因是功德 發心求阿耨多羅三耶三佛。發心立願。今佛授無愁憂菩薩慧。却後當作佛劫盡。願令 我乘其第得作佛於彼剎土中。爾時佛知王婦月明心所願。佛告舍利弗。見王婦月明不 。舍利弗言。見王婦月明。持是功德所作。當棄女人身得男子已。當生忉利天上作天 名寶第一。彌勒佛來下有國王。名呵當為作太子。字終好。當供養彌勒盡壽命。却後 當為彌勒作沙門。上法亦持中法亦持下法亦持。總供養是颰陀劫中怛薩阿竭阿羅呵三 耶三佛。又行菩薩法。是離愁怛薩阿竭得作佛已。寶第一。當於是剎作遮迦越王。名 寶豐。當供養承事怛薩阿竭。盡形壽當承其佛第得作佛。名普明怛薩阿竭阿羅呵三耶 三佛。當教授是無垢濁炎明剎土本剎故。事如離憂怛薩阿竭所治處等無有異。王婦月 明。聞佛說是別。益倍踊躍自嗟歎。其身以珠摩尼直百萬兩金用上佛。從王阿闍貰。 求持五戒別治一處。離婬欲之行。令一切皆修清淨。無愁憂菩薩。始從虛空中來下。 叉手住佛前。願我作佛時令我剎中諸菩薩。自然化生長大法座。袈裟自然著身等無老 少。如年二十之容色。今自願身為沙門。自然被法衣。尋時作彼示現。無愁憂菩薩白 王。法無堅固從空而立從空而坐。於念不念於中立意不散。無所錄在所作為無所屬。 王見是不。是一日之中我為女人變為男子形。復現比丘僧。何者審為諦。是處餘處人 身中有三毒。以三藥療焦盡諸毒。知是法故。大王不當作非法行。當數數詣佛。文殊 師利童男菩薩。所能除人垢增益功德。度不度者。王國中多事欲去隨意。佛告阿難。 無愁憂菩薩受別解諦能持能說。當為一切廣說經法。若有善男子善女人欲求佛道。正 使是三千大千剎土持七寶滿其中。持施怛薩阿竭阿羅呵三耶三佛。不如聞是經信不誹 謗其功德不可計。何況奉行盡形壽。供養繒華幢蓋旗幡。其功德無能計數者。諸比丘 受教。無愁憂菩薩歡喜。王阿闍貰。王婦月明。阿難尊比丘。一切大眾諸天龍神阿須 倫。聞佛說經皆歡喜。前以頭面著地。為佛作禮而去。

佛說阿闍貰王女阿術達菩薩經